

19/10/2002

Pameran sempena ulang tahun ke-10 IKIM

KUALA LUMPUR, Jumaat - Institut Kefahaman Islam Malaysia (IKIM) akan mengadakan pameran sempena sambutan ulang tahun ke-10 penubuhannya, mulai 22 hingga 25 Oktober ini.

Ketua Pengarah IKIM, Datuk Dr Abdul Monir Yaacob, berkata pameran itu bertujuan memberi peluang kepada orang ramai memahami peranan dan fungsi institusi serta kegiatan yang dijalankan sejak satu dekad lalu.

Katanya, antara bahan yang akan dipamerkan ialah sejarah penubuhan, buku dan jurnal terbitannya serta hasil penyelidikan yang dijalankan IKIM.

"Sempena sambutan itu juga IKIM akan menganjurkan Seminar Antarabangsa Dinar Emas Dalam Perdagangan Multilateral pada 22 dan 23 Oktober.

"Perdana Menteri, Datuk Seri Dr Mahathir Mohamad akan melancarkan sambutan ulang tahun ke-10 IKIM sewaktu menutup seminar antarabangsa itu pada petang 23 Oktober ini," katanya.

Dr Abdul Monir berkata, memandangkan seminar berlangsung mulai 22 Oktober, maka pameran hanya akan dibuka kepada orang ramai pada 24 dan 25 Oktober mulai jam 10 pagi hingga 5 petang.

"Selain itu, Perdana Menteri juga akan melancarkan buku baru terbitan IKIM serta sampul surat kenangan IKIM," katanya.

Sempena sambutan itu juga, IKIM akan menganjurkan pertandingan pidato bertema 'Ke Arah Peningkatan Kefahaman Islam di Malaysia' pada 24 Oktober yang disertai 12 peserta dari institut pengajian tinggi awam.

Pada 25 Oktober pula, forum bertajuk 'Islam, Cabaran Semasa dan Ke Arah Pembangunan Ummah' akan diadakan dengan ahli panel terdiri daripada Timbalan Ketua Pengarah IKIM, Nik Mustapha Nik Hassan; Timbalan Rektor Kolej Universiti Islam Malaysia, Prof Datuk Dr Abdullah Mohd Zin dan Fellow Kehormat IKIM, Muhammad Uthman El-Muhammady.